



'Uspjet će ako bude iskren!'

Od Talhe b. 'Ubejdullaha radijallahu 'anhu, prenosi se da je rekao: "Neki čovjek iz Nedžda, raščupane kose došao je Allahovom Poslaniku, sallallahu 'alejhi ve sellem. Čuli smo mu glas, ali nismo razumjeli šta kaže dok se nije približio Allahovom Poslaniku, sallallahu 'alejhi ve sellem. Pitao je o islamu, a Allahov Poslanik, sallallahu 'alejhi ve sellem, mu reče: 'Pet namaza u toku dana i noći!' Na to mu čovjek reče: 'Imam li kakvih drugih obaveza osim toga?' On mu odgovori: 'Ne, osim dobrovoljno.' Zatim mu je Allahov Poslanik, sallallahu 'alejhi ve sellem, rekao: 'I post mjeseca ramazana', a čovjek mu reče: 'Jesam li još šta dužan osim ramazana?', a on mu reče: 'Ne, osim dobrovoljno.' Zatim mu je Allahov Poslanik, sallallahu 'alejhi ve sellem, spomenuo zekat, a čovjek upita: 'Imam li obaveza osim njega?' On mu odgovori: 'Ne, osim da udjeljuješ dobrovoljno!' Potom se čovjek okrenu, govoreći: 'Tako mi Allaha, niti ću na ovo šta dodati niti oduzeti!', na što Allahov Poslanik, sallallahu 'alejhi ve sellem, reče: 'Uspjet će ako bude iskren!'"

[Vjerodostojan] [Muttefekun alejh]

Neki je čovjek iz Nedžda došao Poslaniku, sallallahu 'alejhi ve sellem. Kosa mu je bila raščupana, a glas povišen. Ashabi nisu razumjeli šta govori, sve dok se nije približio Poslaniku, sallallahu 'alejhi ve sellem, i upitao ga o dužnostima u islamu. Poslanik, sallallahu 'alejhi ve sellem, otpočeo je sa namazom, kazavši mu da je obaveza klanjati pet namaza tokom dana i noći. Čovjek upita: "Da li mi je pored tih pet namaza obaveza klanjati nešto drugo?" Odgovorio mu je: "Nije ti obaveza ništa osim ako želiš da klanjaš neke dobrovoljne namaze." Zatim je Poslanik, sallallahu 'alejhi ve sellem, kazao da mu je obaveza postiti mjesec ramazan. Čovjek je upitao: "Da li pored ramazana moram postiti neke druge dane?" Poslanik, sallallahu 'alejhi ve sellem, mu kaza: "Ne moraš da postiš ništa mimo ramazana, osim dobrovoljno." Potom je Poslanik, sallallahu 'alejhi ve sellem, spomenuo zekat, a čovjek ga je ponovo upitao da li pored toga mora još nešto novčano udjeljivati, pa mu je Poslanik, sallallahu 'alejhi ve sellem, rekao da ne mora osim ako želi dobrovoljno. Nakon što je čuo od Poslanika, sallallahu 'alejhi ve sellem, islamske dužnosti, okrenuo se i Allahom zakleo da će te dužnosti izvršavati, ne dodajući ništa na njih, niti od njih oduzimajući. Poslije je Poslanik, sallallahu 'alejhi ve sellem, kazao: "Ako je ovaj iskren onda će uspjeti."

النجاة الخيرية
ALNAJAT CHARITY

